

Ngā Kōhine e Toru

Tērā ētahi kōhine e toru e noho tahi ana ki te māra, he tuākana, tēina rātou, engari he tino rerekē te hanga o tēnā, o tēnā. He tino nui te aroha o tētahi ki tētahi, ā, he piri tahi tētahi ki tētahi.

He kahu māota tō te mātāmuri, ā, ka piri a ia ki te whenua, toro haere ai. Engari ina hiahia tū ia, ka nanao atu ōna wenoweno ki te waewae kaha o te mātāmua, ana ka piki haere.

He kōwhai tētahi o ngā tae kei te kahu o te kōtiro o waenganui, ā, ka whiti ana te rā, he pārekareka ki a ia te omaoma haere i te pārae.

He tū torotika, he tū teitei te mātāmua. He māota anō ōna kākahu, ā, ko ōna makawe kakaho e pīwari ana i te hau. Pērā i ngā mātāmua katoa, he kaha tana tiaki i ana tēina e tipu ana i raro i a ia.

I tētahi rangi i te hiku o te raumati, ka tae mai tētahi tamaiti tāne ki tō rātou kāinga. Kei reira te tamaiti rā e tākaro haere ana, e kōrero ana anō hoki ki ngā manu me ngā kararehe. Me te mīharo o ngā kōhine ki tēnei āhua.

Heoi, ao ake i te ata, kua riro te mātāmuri. Ngau kino te aroha o ōna tuākana ki a ia. Ka tangi tonu rāua ā tae noa ki te ngahuru. Engari kāore tonu tō rāua teina i hoki mai.

Ka tae mai anō te tamaiti rā ki tō rāua kāinga. Kei reira e kohikohi toetoe ana i te taha o te kōawa. Ao ake i te ata, kua riro ko te kōtiro tuarua.

Tū tōtahi ana, tū pōuri ana te mātāmua i te parae ko ia anake. Ka nui tana mokemoke ki ana tēina. Ka makariri haere ngā rā, ka roa haere ngā pō, ka parauri haere, ka pūhutihuti haere ōna makawe, ka māwhe ōna kākahu.

Ka tae ki te kohinga kai whakamutunga mō te tau, ka hoki mai anō te tamaiti rā ki te māra. Kite ana ia i te mokemoke o te mātāmua rā, whakahokia ana e ia ki tōna kāinga.

Ka tae ki tōna kāinga, e hoa, kei reira kē ōna tēina! Kua noho tahi anō te whānau! Ko te mātāmuri e taka pīni ana mō te kai o te ahiahi, ko tō waenganui e noho ana ki te pae, e whakamaroke ana i ōna kiko hei kai ā taihoa ake.

Wehe ana te mātāmua i te rekareka i te noho tahi anō ki ōna tēina. Tahuri ana ia ki te taka puehu kānga hei mahi parāoa.

Mai i taua wā, ā, mohoa noa nei, kua noho atu ngā kōhine nei ki waenga pārae i te kōanga me te raumati, ā, kia takurua, ka hoki ake ki te whareroa hei orange mō te iwi i te wā o te māeke.